

遺教經論住法記并序

大宋餘杭沙門 元照 述

馬鳴大士傳法祖師。跡示四依。位居深地。或宗經而造論。或著論以通經。適協時心。允符聖旨。以謂中霄遺訓。叔世當機。於是假道微言。開萌品彙。且經翻秦世。誦習尤多。論譯陳朝。弘通蓋寡。雖復別開戶牖。競務穿窬。然而未造門牆。孰窺美富。或倚附而撰疏。或採掇以箋經。章句益繁。理味逾隱。況乃唯資談論。罔示修持。壅塞夷途。隳殘正教。譬塵蒙於寶鑑。莫辨妍媸。猶霧掩於冰輪。寧分衢街。是以專依本論。敷暢佛言。仍述記章。申通祖意。研詳理教。搜索古今。的指行門。直決心要。非圖數寶。期用書紳。庶毗贊於真風。俾住持於億載云爾。